



UNIVERSITÄTS-
BIBLIOTHEK
PADERBORN

Universitätsbibliothek Paderborn

Conciliorvm Omnivm Generalivm Et Provincialivm Collectio Regia

Ab anno DLXXVII. ad annum DXC.

Parisiis, 1644

Epistola XXIII. Gregorii Papae I. Ad Castorivm Notarivm. Ne ob pecunias
quisquam eligatur ad sacerdotium, sed ob merita.

urn:nbn:de:hbz:466:1-15221

eo, cuius interest, modis omnibus reparentur. Clerum vero & populum loci ipsius admonere te conuenit, ut omni dilatione postposita, eligant qui sibi reuelante Deo debeat episcopus ordinari.

EPISTOLA XXIII.

GREGORII PAPÆ I.

AD CASTORIVM NOTARIVM.

Ne ob pecunias quisquam eligatur ad sacerdotium,
sed ob merita.

Gregorius Castorio notario.

NIMIS nos Ioannis fratris & coepiscopi nostri mors cognita contristauit; maxime quod ciuitas illa hoc tempore amisit pastoralis curæ solatium. Quia igitur plurimæ utilitates exposcunt, ut in ecclesia ipsa sacerdos sine mora Christo auctore debeat ordinari, ideo experientiæ tuæ præcipimus, quatenus clerum & populum omni instantia studeat adhortari, ut consecrandum sibi non differant eligere sacerdotem. Quos tamen & præ omnibus admonere te volumus, ut in generali causa utilitates proprias non attendant. Nulla ergo sit in hac electione venalitas, ne, dum præmia appetunt, * virtutem discretionis amittant: & illum dignum ad hoc esse arbitrentur officium, qui non meritis sed datione placuerit. Specialiter enim & absolute cognoscant, quia non solum indignus est sacerdotio, sed & aliis profecto erit culpis obnoxius, quisquis Dei donum precii præsumpserit venalitate mercari. Non itaque largus præmiis, sed dignus meritis eligatur. Nam & electum & eligentes par pœna respiciet, si sacerdotii sinceritatem mente sacrilega violare tentauerint. Siue autem vnus, siue duo electi fuerint, quinque de prioribus presbyteris, & quinque de præcedentibus diaconibus simul venire ad nos per omnia commoneto. De clericis vero, præter eos qui venire deliberant, si quos alios præsentem esse necessarios aestimas, ad nos sine mora trans mitte, ut ad ordinandam Dei ecclesiam nec excusatio, nec aliqua possit præuenire dilatio.

* al. discretionem electionis

Ecc iij